



08. Oktober. 2018

UKA 2018/19

Atassut

Aqqaluk Heilmann

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarneq pillugu inatsisip (Kinguaassiuutitigut pinerluttarnerit il.il.) allangortinneri pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut.**

(Aningaasaqarnermut Akileraartarnermullu Naalakkersuisoq)

Atassummiit aallaqqaasiullugu oqaatigissavarput Kalaallit Nunaanni eqqartuussisarneq pillugu siunnersuisoqatigiit 2016-imi ataatsimiinnerminni aalajangersimasaat kinguaassiuutitigut atornerluineq pillugu maleruagassaasa danskit maleruagassaat sapinngisamik assigisagaat tunngaviatigut ilalernartikkatsigu. Pissutigalugu inuit tamat pisinnaatitaaffii illersungaaffiilu naalagaaffeqatigiinnerup iluani assigiinnerusumik naapertuilluartumillu atungassaqartinneqarnissaat qulakkeersimasariaqaratsigu.

Atassummiit ima oqaaseqarfigisavarput:

Kattuffiit susassaqtartullu allat tusarniaaffigineqarsimasut oqariartuutaasa saniatigut immikkut eqqarsaatigineqarsinnaasut pisariaqassappallu misissuiffigalugit qulaajarneqarsinnaasunik suli peqarsorinarpoq. Aalajangiiffissatut siunnersuut siullermeerneqarnerani nalilersuinnermut ilanngullugit.

Kalaallit Nunaanni pinerluttulerinermut inatsisip nalimmassaqqinneqarnerani ilanngullugit eqqarsaatigineqartariaqarput pinerluttoq pisariaqartitaatigut ikiorserneqarsinnaanissaanut aamma periarfissinneqarsinnaasariaqarmat, soorlu tarnimikkut allatigulluunniit inuunerlunnikkut ikiortarialiusimappat inuttut ingerlariaqqinnissaminut ikorfartorneqarsinnaasariaqarami. Kiisalu taassuma avatagiisai ilaqutaalu aamma inunnik isumaginninnikkut kommuni-p susassaqarfiata iluani inatsisartut inatsisiliaatigut periarfissaat ilanngullugu pitsanngorsaavigineqarsinnaanera periarfissaasariaqarsorinarpoq.

Uani pinerluttulerinermi inatsit eqqartoraluarippat, puigunngisaannassavarput eqqugaasoq aamma sapinngisamik annertunerpaamik ikiorserneqartarnissaa qulakkeertariaqaratsigu.

Atassummiit kinguaassiuutitigut kannguttaatsuliortarnermut inatsisip sukaternersinnaanera taperserparput. Isumaqarpugulli ajornartorsiut qaangernissaanut sukaterineq kisimi aqutissaanngitsoq.



Pisortat ingerlatsiviisa ataanni susassaqtut pinaveersaartitsinermik suliaqtut ajornartorsiummik annikillisaanissamat suleqataasinnaanerinut iliuusissat ullumikkumut atuutereersut misissoqqinneqartariaqarput nalimmassaqqittariaqarpullu. Atorfilittallu inunnik isumaginninnermut suliaqtut aammalu kommunini tamani inunnik isumaginninnermut ataatsimiititaliat isumaat ilanngullugit tusarniutigineqartariaqtutut pisariaqassappat ilanngullugu nalilersugassaavoq, siunertaralugu inatsit atuutilerneqartussaq naapertuilluartumik inissinneqartussaammat.

Taamatut oqaaseqareerlunga Atassummiit siunnersuut ataatsimiititaliamut ingerlateqqinneqarnissaa innersuupparput.